

TSEV NEEG

PHAU NTAWV QHIA KEV

TSEV NEEG

PHAU NTAWV QHIA KEV

Luam tawm los ntawm
Yexus Khetos lub Koom Txoos ntawm
Tsoom Haiv Neeg Ntseeg hauv Hnub Nyoog Kawg
Salt Lake City, Utah

© 1992, 1999, 2001, 2006 los ntawm Intellectual Reserve, Inc.

Ceev txhua txoj cai

Luam tawm hauv lub teb chaws Amelikas

Pub txhais ua lus Amelikas: 2/06

Pub txhais ua lus Hmoob: 2/06

Kev txhais *Family Guidebook*

Hmong

Phiaj Qhia Nrhiav Zaj

| | |
|--|----|
| “Tsev Neeg: Ib zaj Lus Tshaj Tawm rau lub Ntiaj Teb” | iv |
| Tus Txheej Txheem thiab lub Ntsiab ntawm Tsev Neeg | 1 |
| Txoj Kev Qhia Txoj Moo Zoo Hauv lub Tsev | 5 |
| Ua Raws Li tej Kev Lav Ris hauv Tsev Neeg | 15 |
| Txoj Kev Kawm Ua Thawj Coj | 19 |
| Muaj Txoj Kev Teev Ntuj Nyob Tom Tsev (Rau tej Yim Neeg uas Nyob Nrug Deb lub Koom Txoos) | 20 |
| Lub Pov Thawj Hwj Tej Kab Ke thiab tej Koob Hmoov | 22 |
| Txoj Kev Yuav lub Koom Txoos cov Ntaub Ntawv thiab txoj Kev Tshawb Nrhiav Xov Xwm txog Keeb Kwm Tsev Neeg | 32 |

“Tsev Neeg: Ib Zaj Lus Tshaj Tawm Rau Lub Ntiaj Teb”

Thaum xyoo 1995, Thawj Pawg Thawj Tswj Hwm thiab Pawg Kaum Ob Tug Thwj Tim tau hais “Tsev Neeg: Ib zaj Lus Tshaj Tawm rau lub Ntiaj Teb” tawm. Tej lus tshaj tawm no yog tej lus uas qhia thiab tej lus uas rov qab qhia tej lus qhuab qhia thiab tej yam coj ua uas cov yaj saub tau qhia ntau zaus hauv lub Koom Txoos zaj keeb kwm. Nws qhia txog tej ntsiab cai uas tseem ceeb rau txhua tsev neeg txoj kev zoo siab thiab txoj kev sib raug zoo. Cov muaj nyob hauv ib tse neeg yuav tsum kawm lus tshaj tawm no thiab ua raws li tej yam nws qhia.

“Peb, Thawj Pawg Thawj Tswj Hwm thiab Pawg Kaum Ob tug Thwj Tim ntawm Yexus Khetos lub Koom Txoos ntawm Tsoom Haiv Neeg Ntseeg hauv Hnub Nyoo Kawg, tshaj tawm tiag tiag hais tias txoj kev sib yuav ntawm ib tug txiv neej thiab ib tug poj niam yog raug tsa los ntawm Vajtswv thiab tias tsev neeg yog lub ntsiab ntawm tus Tsim lub tswv yim rau nws cov me nyuam txoj hmoov nyob mus ib txhis li.

“Txhua txhia tus tib neeg—txiv neej thiab poj niam—raug tsim muaj yam ntxwv zoo li Vajtswv. Txhua txhia tus yog nkawm niam txiv saum ntuj ceeb tsheej ib tug tub ntsuj plig los yog ib tug ntxhais ntsuj plig uas nkawd hlub thiab xws li txhua tus yog li ntawd, txhua txhia tus muaj ib tug kheej thiab txoj hmoov los saum ntuj los. Kev ua ib tug poj niam los sis ib tug txiv neej yog ib yam tseem ceeb ntawm ib tug neeg tus kheej thiab lub ntsiab, txawm hais tias nyob lub qub neej los yog, lub neej no los yog, lub neej nyob mus ib txhis li los yog.

“Nyob rau lub qub neej, tej tub ntsuj plig thiab tej ntxhais ntsuj plig tau paub thiab teev tiam Vajtswv ua lawv Leej Txiv uas Nyob Mus Ib Txhis Li thiab lawv tau txais yuav nws lub tswv yim uas nws cov me nyuam yuav tau ib lub cev nqaij daim tawv thiab yuav tau ib lub sij hawm saum ntiaj teb no kom xyaum tau ua neeg zoo tag nrho thiab thaum kawg ncau tau lawv txoj hmoov los saum ntuj los ua cov uas txais txoj sia nyob mus ib txhis ua lawv tug. Txoj kev zoo siab los saum ntuj los ua rau kev ua niam ua txiv, ua tub ua ntxhais, ua kwv ua tij, ua neej ua tsa nyob mus li dhau lub qhov ntxa. Tej kab ke tseem ceeb dawb ceev thiab tej kev cog lus uas muaj hauv tej tuam tsev dawb huv ua rau tib neeg rov qab mus nyob tau ntawm Vajtswv lub xub ntiag thiab ua rau tsev neeg nyob tau ua ke mus ib txhis li.

“Thawj lo lus txib uas Vajtswv txib kom Adas thiab E-vas ua hais ntsig txog nkawd txoj kev ua niam ua txiv. Peb tshaj tawm hais tias Vajtswv lo lus txib uas hais kom nws cov me nyuam huaj vam mus puv tas lub ntiaj teb

tseem muaj zog lawm. Tsis tas li ntawd xwb, peb tshaj tawm ntxiv hais tias Vajtswv tau txib kom tej hwj chim tseem ceeb dawb ceev ntawm sab kev muaj tub muaj ki yuav tsum siv tsuas yog ntawm ib tug txiv neej thiab ib tug poj niam xwb, uas tau sib yuav raws li kev cai lij choj ua niam ua txiv.

“Peb tshaj tawm hais tias txoj hau kev uas yus tsim tau txoj sia hauv ntiaj teb no raug tsa los ntawm Vajtswv los. Peb pom zoo rau qhov uas ib tug neeg txoj sia yog ib yam tseem ceeb dawb ceev thiab uas nws tseem ceeb rau Vajtswv lub tswv yim nyob mus ib txhis li.

“Ib nkawg niam txiv twg muaj ib txoj kev lav ris tseem ceeb kom ib tug hlub thiab saib xyuas ib tug thiab kom hlub thiab saib xyuas nkawd cov me nyuam. ‘Me nyuam yog tej paj tshab uas tus Tswv pub rau neeg’ (Nkauj Qhuas Vajtswv 127:3). Niam txiv muaj ib lub luag hauj lwm tseem ceeb dawb ceev kom cob nkawd cov me nyuam raws li kev hlub thiab kev ncaj ncees, kom npaj muab raws li lawv xav tau ntawm sab nqaij daim tawv thiab sab ntsuj plig, kom qhia lawv sib hlub thiab sib pab, kom ua raws li Vajtswv tej lus txib thiab kom ua pej xeeb uas ua raws li kev cai lij choj txawm nyob qhov twg los xij. Tej txiv thiab poj niam—niam tsev thiab txiv tsev—yuav tsum ceeb toom rau Vajtswv hais ntsig txog lawv txoj kev ua raws li tej kev lav ris no.

“Tsev neeg raug tsa los ntawm Vajtswv. Txoj kev sib yuav ntawm ib tug txiv neej thiab ib tug poj niam

tseem ceeb heev rau Nws lub tswv yim nyob mus ib txhis li. Tej me nyuam tsim nyog yug los raws li txoj kev sib khi ntawm txoj kev sib yuav, thiab tsim nyog muaj niam muaj txiv, uas ua ib siab hawm tej lus cog tseg ntawm txoj kev sib yuav, cob lawv loj hlob. Ib tse neeg twg haj yam yuav ncav tau kev zoo siab hauv lawv lub neej thaum tus Tswv Yexus Khetos cov lus qhuab qhia ua lawv lub hauv paus. Tej kev sib yuav thiab tej tsev neeg uas kav ntev raug tsa thiab nyob mus li ntawm tej kev cai xws li kev ntseeg, kev thov Vajtswv, kev hloov siab lees txim, kev zam txim, kev sib hwm, kev hlub, kev hmov tshua, kev ua hauj lwm, thiab kev ua si uas tsim nyog ua. Los ntawm lub tswv yim los saum ntuj los, cov txiv tsev yuav tsum kav lawv tej tsev neeg los ntawm kev hlub thiab kev ncaj ncees thiab lav ris npaj muab tej yam yuav tsum muaj ua neej thiab tej kev pov hwm rau lawv tsev neeg. Cov niam tsev txoj kev lav ris thib ib yog tu lawv cov me nyuam. Nyob rau tej kev lav ris tseem ceeb dawb ceev no, tej niam tsev txiv tsev yuav tsum sib pab xws li nkawd nyob sib txig. Tej zaum kev mob nkeeg, kev tuag, los yog lwm yam yuav ntxim ua txawv tej lus no. Thaum twg ib tse neeg xav tau kev pab nws tsim nyog tej kwv tij neej tsa cev tes mus pab thiab.

“Peb ceeb toom hais tias cov neeg uas txhaum tej kev khi lus ntawm kev coj dawb huv, cov uas tsim txom lawv tus khub los yog lawv cov me nyuam,

los yog cov uas tsis lav ris koob lawv tsev neeg yuav muaj ib hnuv twg uas lawv yuav lav ris txog tej no rau ntawm Vajtswv lub xub ntiag. Hais txuas ntxiv, peb ceeb toom hais tias txoj kev puas tsuaj ntawm tsev neeg yuav koj tej kev kub ntxhov uas cov yaj saub yav thaum ub thiab niaj hnuv nim no hais txog los rau saum tej tib neeg, zej zog, thiab teb chaws.

“Peb nqua hu kom cov pej xeeb zoo thiab cov nom tswv ntawm tseem fww nyob txhua qhov txhia chaw txhawb nqa tej kev lis kev cai uas raug tsim kom yug thiab ntxiv dag zog rau tsev neeg kom thiaj ua tau lub xam khoo pawg neeg tseem ceeb tshaj plaws.” (*Ensign*, Kaum Ib Hlis 1995, 102).

Tus Txheej Txheem thiab lub Ntsiab ntawm Tsev Neeg



Tus Txheej Txheem

Tsev neeg yog ib qho dawb ceev hauv Yexus Khetos lub Koom Txoos ntawm Tsoom Haiv Neeg Ntseeg hauv Hnub Nyooog Kawg thiab yog pawg tseem ceeb tshaj plaws rau lub sij hawm no thiab rau lub neej nyob mus ib txhis. Vajtswv tau tsa muaj tej tsev neeg



kom koj kev zoo siab rau Nws cov me nyuam, kom pab lawv kawm tej ntsiab cai zoo hauv ib qho chaw muaj kev sib hlub, thiab kom npaj lawv rau lub neej nyob mus ib txhis.

Ib lub tsev yog qhov chaw zoo tshaj plaws kom qhia, kawm, thiab ua raws li txoj moo zoo tej ntsiab cai. Nws yog qhov chaw uas neeg kawm kom npaj tej zaub mov, khaub ncaws, qhov chaw tiv thaiv, thiab lwm yam uas lawv xav tau. Tus txiv tsev thiab tus niam tsev, uas nyob sib txig, yuav tsum pab txhua tus hauv tsev neeg kom:

- Nrhiav tau kev tseeb thiab ua kom muaj kev ntseeg Vajtswv.
- Hloov siab lees txim, ua kev cai raus dej kom tau kev zam lub txim,

los ua ib tug mej zeej hauv Yexus Khetos lub Koom Txoos ntawm Tsoom Haiv Neeg Ntseeg hauv Hnub Nyoog Kawg, thiab txais tus Vaj Ntsuj Plig Dawb Huv.

- Ua raws li Vajtswv tej lus txib, rau siab kawm cov vaj lug kub, thov Vajtswv yus tus kheej txhua hnub, thiab mus pab luag tej.
- Nrog luag tej tham txog txoj moo zoo.
- Txais lub vaj txiaj ntsim thiab nrog ib tug khub tsim nyog sib yuav hauv lub tuam tsev kom nyob mus ib txhis, tsim kom muaj ib lub tsev muaj kev zoo siab puv npo rau tsev neeg, thiab txhawb nqa tsev neeg los ntawm kev hlub thiab kev txi.



- Nrhiav kom tau lus qhia txog cov poj koob yawm txwv uas tau tuag lawm thiab ua tej kab ke hauv lub tuam tsev pub rau lawv.
- Ua tej yam kom ntxiv zog rau sab ntsuj plig, rau tus neeg txoj kev nrog lwm tus neeg sib raug zoo, rau cev nqaij daim tawv, thiab rau kev noj qab nyob zoo.



Tus txiv tsev coj nws tsev neeg thiab nws muaj ntiag tug kom qhia cov me nyuam thiab muab txhua yam uas nws tsev neeg xav tau. Ib tug txiv tsev hauv lub Koom Txoos uas tsim nyog thiab coj kev cai zoo muaj cai tuav lub pov thawj hwj, uas yog lub hwj chim thiab txoj cai ua hauj lwm sawv tus Vajtswv cev. Thaum muaj lub hwj chim thiab txoj cai no, tus txiv tsev thiaj li peem los ua tus thawj coj ntawm lub pov thawj hwj rau nws tsev neeg. Nws coj nws tsev neeg kom lawv yuav npaj rov qab mus rau pab Leej Txiv Saum Ntuj Ceeb Tsheej lub xub ntiag. Nws tus poj niam yog nws tus khub, tus kwv luag, thiab tus pab cuam tseem ceeb. Tus txiv tsev thiab tus niam tsev yuav tsum sib tham ua ke txog tej yam uas nkawd yuav ua rau nkawd tsev neeg.

Tus txiv tsev yuav tsum ua tej yam kom yug nws tsev neeg ntawm sab ntsuj plig. Nws yuav tsum saib xyuas kom Yexus Khetos txoj moo zoo raug muab qhia rau lawv thiab ua txhua yam nws ua tau kom yaum lawv thiab pab lawv ua raws li tus Tswv tej lus txib.

Ib tug txiv tsev uas tuav lub pov thawj hwj foom tau koob hmoov rau cov hauv nws tsev neeg thiab pab lawv tej kev toob kas ntawm sab ntsuj plig. Los ntawm txoj cai ntawm lub pov thawj hwj yog no thiab los ntawm *kev pom zoo ntawm nws tus thawj koj ntawm lub pov thawj hwj*, tus txiv tsev:

1. Muab lub npe rau thiab foom koob hmoov rau me nyuam.
2. Muab me nyuam (thiab lwm tus) ua kev cai raus dej.
3. Pom zoo rau cov me nyuam (thiab lwm tus) los ua mej zeej hauv lub Koom Txoos thiab muab tus Vaj Ntsuj Plig Dawb Huv rau lawv.
4. Muab lub pov thawj hwj rau nws cov tub (thiab lwm tus) thiab tsa lawv tuav ib txoj hauj lwm hauv lub pov thawj hwj.
5. Foom koob hmoov rau thiab faib lub cim nco txog.
6. Fij qua ntxa.

Tus txiv tsev uas tuav lub Pov Thawj Hwj Mekixedes, *tsis toob kas kev pom zoo los ntawm nws tus thawj koj ntawm lub pov thawj hwj* kom tshwj roj tseg thiab foom koob hmoov rau cov hauv nws tsev neeg thiab lwm tus thaum uas lawv mob thiab muab tej koob hmoov tseem ceeb rau lawv thaum lwm lub sij hawm uas lawv toob kas. (Saib phab 18–25 hauv phau ntawm pab no rau tej lus qhia ntxiv kom txawj ua lub pov thawj hwj tej kab ke thiab tej koob hmoov.)

Tus txiv tsev yuav tsum saib xyuas nws tsev neeg txoj kev koom ua peb txoj kev lav ris no:

1. Npaj rau tus kheej thiab tsev neeg ntawm sab ntsuj plig thiab ntawm cev nqaij daim tawv.
2. Faib txoj moo zoo.
3. Ua tsev neeg keeb puam thiab ua lub tuam tsev tej kab ke rau cov ciai thiab cov tuag tib si.

Tus niam tsev yog nws tus txiv tus kwv luag thiab tus pab cuam uas nyob sib txig. Nws pab nws tus txiv qhia Vajtswv tej kev cai rau nkawd cov me nyuam. Yog tias tsis muaj tus txiv hauv lub tsev, tus niam tsev koj kav nws tsev neeg.

Tus txiv tsev thiab tus niam tsev yuav tsum tuav tib lub ntsiab. Nkawd lub hom phiaj yuav tsum yog npaj tag nrho txhua tus hauv nkawd tsev neeg kom rov qab mus rau peb Leej Txiv Saum Ntuj Ceeb Tsheej. Nkawd yuav tsum koom ib siab thaum uas nkawd ua hauj lwm ncau cuag lub hom phiaj no. Tus Tswv tau txhim tsa lub Koom Txoos kom pab cov txiv tsev thiab cov niam tsev qhia thiab tu lawv tsev neeg.

Thaum uas muaj me nyuam los yug hauv tsev neeg, cov niam txiv yuav tsum hlub lawv, qhia txoj moo zoo tej kev tseeb rau lawv, thiab ua yam ntxwv zoo txog kev ua neej ncaj ncees. Cov me nyuam yuav tsum hwm thiab ua raws li lawv niam txiv qhia.

Lub Koom Txoos muaj zog thaum uas tej tsev neeg thiab tej neeg ua raws li Yexus Khetos txoj moo zoo. Ib tse neeg yuav zoo siab txais txoj moo zoo tej koob hmoov ntau dua thaum uas tus txiv tsev thiab tus niam tsev to taub thiab ua tib zoo ua lawv txoj hauj lwm ua niam txiv. Lub Koom Txoos yuav tsis ua tej yam los sis muab hauj lwm rau cov txiv tsev thiab cov niam tsev uas yuav hnyav dhau los sis ua rau lawv poob siab los sis kom lawv tso lawv tej hauj lwm ua niam txiv no tseg.

Lub Ntsiab

Vim peb Leej Txiv Saum Ntuj Ceeb Tsheej hlub peb, Nws xav kom peb txais kev tsa nto siab zoo ib yam li Nws. Kom thiaj li pab peb, Nws tau muab ib txoj kev uas tau raug tsim ntawm Vajtswv tej kev cai tseeb rau peb raws. Cov uas kawm paub txog txoj kev no thiab rau siab ua raws li nws yeej yuav muaj ib hnuv uas lawv

cov no yuav rais los mus ua neeg zoo li Leej Txiv Saum Ntuj Ceeb Tsheej thiab ua neej nyob zoo ib yam Nws.

Ib qho ntawm txoj kev no yog qhov uas peb yuav tsum ncaim tawm ntawm ntuj ceeb tsheej los rau lub ntiaj teb. Nyob ntawm no peb txais ib lub cev uas muaj nqaij muaj tawv, kawm los ntawm tej uas peb tau ua lawm, thiab ua peb lub neej kom peb thiaj tsim nyog rov qab mus nrog Vajtswv nyob. Peb qhia tias peb tsim nyog thaum peb ywj siab xaiv ceev Nws tej kev cai. (Saib Anplaham 3:23–25; 2 Nifais 2:27.)

Kom thiaj pab peb npaj peb tus kheej rau lub neej nrog Nws nyob, peb Leej Txiv Saum Ntuj Ceeb Tsheej tau sau peb los ua ke ua tej tsev neeg. Los ntawm tej kab ke thiab kev khi lus dawb ceev, peb tsev neeg thiaj muaj cai raug muab sib khi ua ib ke tas mus li.

Txoj Kev Qhia Txoj Moo Zoo hauv lub Tsev



Siv lub Siab Zoo thiab Kev Hlub Thaum Qhia cov Me Nyuam

Tus Tswv tau txib kom cov niam txiv qhia txoj moo zoo rau lawv cov me nyuam. Nws hais tias:

Yog cov niam txiv muaj me nyuam hauv Xi-oos los sis hauv Xi-oos tej ceg txheem ntseeg uas raug tsim lawm thiab tsis qhia lawv kom lawv to taub tej lus qhuab qhia li kev hloov siab lees txim; kev ntseeg Khetos, uas yog Vajtswv uas muaj sia nyob tus tub; thiab kev cai raus dej thiab kev txais lub txiaj ntsim Vaj Ntsuj Plig Dawb Huv thaum muaj yim xyoo, qhov txhaum yuav los rau saum cov niam txiv lub taub hau.

Qhov no yuav yog ib txoj kev cai rau cov nyob hauv Xi-oos los sis hauv Xi-oos ib ceg txheem ntseeg twg los xij.

Lawv cov me nyuam yuav ua kev cai raus dej rau kev zam lawv lub txim txhaum thaum lawv muaj yim xyoo, thiab lawv yuav txais kev tsa tes rau saum lawv lub taub hau.

Thiab cov niam txiv kuj yuav tsum qhia lawv cov me nyuam kom thov Vajtswv thiab sawv coj kev ncaj ncees rau ntawm tus Tswv. (Saib Q&K 68:25–28.)

Niam thiab txiv yuav tsum muaj lub siab zoo thiab kev hlub thaum lawv qhia, thiab nco qab ntsoov tus Thwj Tim Pov Lauj cov lus qhia uas hais tias “yuav tsum qhuab ntuas [nej

cov me nyuam] kom loj hlob zoo thiab ua raws li Vajtswv tej lus qhia” (Efexaus 6:4).

Tsev Neeg txoj Kev Kawm Vaj Lug Kub

Peb hloov los ua neeg li peb Leej Txiv Saum Ntuj Ceeb Tsheej thiab ua neej nyob zoo li Nws ua thaum peb ceev tej kev cai uas muab tsim kom tau txoj koob hmoov ntawd xwb (saib Q&K 130:20–21). Ua ntej peb ceev tau tej kev cai ntawd, peb yuav tsum paub tias lawv yog dab tsi. “Ib tug neeg txais tsis tau kev cawm dim yog tias nws tsis paub kev cai. (Saib Q&K 131:6.)”

Yexus Khetos yog peb tus thawj coj thiab tus uas muab kev cai rau peb. Nws paub txoj kev uas peb yuav tsum taug thiab paub tej kev cai uas peb yuav tsum ceev, thiab Nws tau caw peb txhua tus kom raws Nws qab. Nws hais tias, “Kuv yog txoj kev, kuv yog qhov tseeb thiab yog txoj sia. Tsis muaj leej twg yuav mus cuag tau Leej Txiv tsuas yog los ntawm kuv mus xwb thiaj tau” (Yauhas 14:6). Kom yuav rais los ua neeg li Vajtswv thiab rov qab mus nrog Nws nyob, peb yuav tsum kawm Yexus tej lus qhia thiab ua raws li tej ntawd. Peb muaj cov vaj lug kub kom pab peb kawm paub txog Yexus Khetos lub neej, tej lus qhia, thiab tej lus txib.

Plaub phau ntawv uas lub Koom Txoos pom zoo hais tias yog vaj lug kub yog phau Npaiv Npaum, Phau

Ntawv Maumoos, Phau Lus Qhuab Qhia thiab Kev Khi Lus, thiab Phau Hlaws uas Muaj Nqis. Lawv piav txog txoj moo zoo tej kev cai thiab txog tej yam kev ntseeg uas peb yuav tsum siv kom ntsuas tag nrho tej kev xav, tej kev ua, thiab tej lus qhia. Lawv pab peb kawm paub txog Yexus Khetos lub neej thiab tej lus qhia thiab lawv qhia txog cov neeg tej yam ntxwv uas muaj kev ntseeg Vajtswv thiab uas tau ceev Nws tej lus txib.

Yexus tau qhia peb kom peb tshawb nrhiav thiab kawm cov vaj lug kub (saib Yauhas 5:39; 3 Nifais 23:1; Q&K 88:118).

Ib tse neeg yuav tsum kawm cov vaj lug kub ua ke ntau zaus kom thiaj kawm txog thiab ua raws li tus Tswv tej lus qhia. Niam thiab txiv yuav tau sau lawv tsev neeg los ua ke thaum tib lub sij hawm txhua hnuv kom los kawm thiab sib tham txog cov vaj lug kub. Txhua tus hauv tsev neeg uas nyeem tau yuav tsum muaj cib fim los nyeem cov vaj lug kub.



Tej zaum ib tug hauv tsev neeg thov tau Vajtswv ua ntej yuav nyeem cov vaj lug kub thiab thov Leej Txiv Saum Ntuj Ceeb Tsheej kom foom

koob hmoov rau txhua tus kom lawv to taub tej lus uas yuav nyeem thiab kom lawv txais tej lus tim khawv txog tej ntawd. Tej zaum tej tsev neeg yuav xav kom lawv tsev neeg thov Vajtswv ua ke tom qab lub sij hawm nyeem vaj lug kub tag lawm.

Thaum tej tsev neeg nyeem thiab xav txog cov vaj lug kub, lawv yuav xav hloov los ua li tus Cawm Seej ntau dua thiab yuav nrhiav tau kev zoo siab thiab kev thaj yeeb nyab xeeb ntau dua hauv lawv lub neej.

Kev Thov Vajtswv Yus tus Kheej thiab Ua Ib Tse Neeg

Peb txhua tus yuav tsum kawm kom txawj nrog Leej Txiv Saum Ntuj Ceeb Tsheej sib tham los ntawm kev thov Vajtswv. Nws hlub peb thiab xav kom peb nrog Nws tham. Nws xav kom peb ua Nws tsaug rau peb tej koob hmoov thiab thov kom Nws pab thiab coj peb. Nws yuav pab peb thaum peb thov. Peb ib txwm thov Vajtswv thaum peb nyo peb taub hau thiab qe peb qhov muag thiab thaum uas peb tab tom txhos caug, zaum, los sis sawv ntsug.

Peb yuav tsum nco qab ntsoov txog plaub txog ntsiab cai thaum peb thov Vajtswv:

1. Peb pib peb tej kev thov Vajtswv hais lus rau Leej Txiv Saum Ntuj Ceeb Tsheej: "Peb Leej Txiv Saum Ntuj Ceeb Tsheej . . ."
2. Peb ua peb Leej Txiv Saum Ntuj Ceeb Tsheej tsaug rau tej yam Nws

muab pub rau peb: "Peb ua Koj tsaug . . ."

3. Peb thov kom Nws pab peb ua tej yam uas peb xav tau: "Peb thov Koj . . ."
4. Peb xaus peb tej lus thov los ntawm tus Cawm Seej lub npe: "Los ntawm Yexus Khetos lub npe, amees."

Peb tej lus thov Vajtswv yuav tsis tas raws tag nrho plaub theem no, tiam sis lawv yuav pab peb kawm thov. Peb ib sij yuav tsum pib thiab xaus peb tej lus thov siv theem thib ib thiab theem thib plaub tiam sis tej uas peb hais hauv qhov nruab nrab yuav nyob ntawm tej yam peb xav tias tseem ceeb dua. Yuav muaj tej zaum peb yuav xav siv lub sij hawm thov Vajtswv ua peb Leej Txiv Saum Ntuj Ceeb Tsheej tsaug ntau dua. Muaj qee zaum peb ho yuav xav siv peb lub sij hawm thov Vajtswv thov kom Nws pab peb ntau dua.



Kev Thov Vajtswv Yus tus Kheej

Txhua tus neeg yuav tsum thov Vajtswv nws tus kheej tsawg kawg nkaus ib zaug thaum yav sawv ntxov thiab yav tsaus ntuj txhua txhua hnuv. Cov niam txiv yuav tsum qhia cov me nyuam kom thov Vajtswv lawv tus kheej thaum uas lawv pib txawj hais lus. Cov niam txiv qhia tau cov me nyuam thov Vajtswv los ntawm kev txhos caug nrog lawv thiab qhia kom lawv hais ib kab lus zuj zus lawv yus qab. Tsis ntev ces cov me nyuam yuav txawj thov Vajtswv lawv tus kheej lawm.

Kev Thov Vajtswv Ua Ib Tse Neeg



Txhua tsev neeg yuav tsum thov Vajtswv txhua hnuv. Ib tse neeg tag nrho txhos caug ua ke, thiab thawj coj rau tsev neeg yuav thov Vajtswv los yog hais kom lwm tus thov. Txhua tus yuav tsum muaj ib lub cib fim thov Vajtswv. Cov me nyuam yaus yaus thov Vajtswv tau yog lawv cov

niam txiv pab lawv. Lub sij hawm thaum ib tse neeg thov Vajtswv yog ib lub sij hawm zoo heev los qhia cov me nyuam kom lawv txawj thov Vajtswv thiab qhia tej ntsiab cai xws li kev ntseeg Vajtswv, kev txo hwj chim, thiab kev hlub.

Tej Kev Thov Vajtswv Tshwj Xeeb

Cov niam txiv yuav tsum qhia lawv cov me nyuam tias Vajtswv yuav hnov lawv tej lus thov thaum lub sij hawm twg los tau. Ntxiv rau lub sij hawm lawv ib txwm thov, lawv thov thaum twg lawv xav tau kev pab dab tsi los sis lawv xav ua Vajtswv tsaug los tau.

Thov Vajtswv Foom Koob Hmoov rau cov Zaub Mov Noj



Niam thiab txiv yuav tsum saib xyuas kom tsev neeg txhua tus paub ua Vajtswv tsaug rau lawv cov zaub mov noj thiab kom txawj thov Nws foom koob hmoov rau cov zaub cov mov ua ntej lawv yuav noj. Txhua tus, cov me nyuam yaus huv tib si, yuav tsum muaj lawv thib thov Vajtswv foom koob hmoov li no. Txoj kev thov Vajtswv foom koob hmoov rau cov

zaub mov noj yuav pab cov niam txiv thiab cov me nyuam muaj siab xav ua peb Leej Txiv Saum Ntuj Ceeb Tsheej tsaug.

Tsev Neeg Hmo Ua Ke

Tsev neeg hmo ua ke yog rau sawv daws, kuj hais txog tej khub niam txiv uas nyuam qhuav sib yuav, cov leej txiv thiab leej niam uas muaj me nyuam, cov niam los sis txiv uas tsis muaj khub tiam sis muaj me nyuam, cov niam txiv uas tsis muaj me nyuam hauv tsev lawm, cov neeg laus uas tsis muaj poj niam tsis muaj txiv ua tej pawg neeg ua tsev neeg hmo ua ke, thiab cov uas nyob lawv ib leeg los sis muaj phooj ywg nrog lawv nyob. Txhua tus neeg, txawm tias lawv nyob li cas los xij, yuav tau koob hmoov thaum lawv koom ua tsev neeg hmo ua ke. Lub Koom Txoos muab hnuv Vas Cas tseg cia tsis ua lwm yam kev sib ntsib dab tsi rau hnuv ntawd kom tej tsev neeg koom tau ua tsev neeg hmo ua ke.



Thawj Pawg Thawj Tswj Hwm tau hais tias: “Peb cog lus tseg rau nej tias nej yuav tau cov koob hmoov zoo

kawg nkaus yog tias nej ua raws li tus Tswv tej lus ntuas thiab ua ib siab sib koom ua tsev neeg hmo ua ke. Peb pheej thov Vajtswv kom cov niam txiv hauv lub Koom Txoos yuav txais lawv ntiag tug hauj lwm los qhia thiab ua yam ntxwv zoo txog txoj moo zoo tej ntsiab cai rau lawv cov me tub me nyuam tau saib. Thov Vajtswv foom koob hmoov rau nej kom nej rau siab ua txoj ntiag tug hauj lwm tseem ceeb no” (“Message from the First Presidency,” *Family Home Evening Resource Book* [1983], iv).

Vim nws yog tus yawg suab hauv nws tsev neeg, tus txiv tsev yog tus coj kav hauv tsev neeg hmo ua ke. Thaum tsis muaj ib tug txiv tsev, tus niam ua tus coj kav. Niam thiab txiv saib xyuas los sis txib ib tug neeg ntawm tsev neeg kom coj kav tsev neeg hmo ua ke. Lawv qhia zaj lus qhia los sis thov kom ib tug me nyuam uas muaj hnuv nyoog txaus qhia. Txhua tus uas muaj hnuv nyoog txaus lawm yuav tsum muaj cib fim koom tes ua tsev neeg hmo ua ke. Cov me nyuam hluas zog ua ntau yam pab tau zoo li coj ib zaj nkauj, qhia ib nqe vaj lug kub, teb tej lus noog, muab duab rau sawv daws saib, faib cov khob noom noj, thiab thov Vajtswv.

Tus txheej txheem rau tsev neeg hmo ua ke nyob nram qab no:

- Hu nkauj qhib (los ntawm tsev neeg)
- Thov Vajtswv qhib (los ntawm ib tug hauv tsev neeg)

- Hais ib zaj paj lug los sis nyeem vaj lug kub (los ntawm ib tug hauv tsev neeg)
- Zaj lus qhia (los ntawm tus txiv tsev, tus niam tsev, los sis ib tug me nyuam laus zog)
- Kev ua si (ib tug hauv tsev neeg yuav coj thiab tsev neeg tag nrho yuav koom tes ua)
- Hu nkauj xaus (los ntawm tsev neeg)
- Thov Vajtswv xaus (los ntawm ib tug hauv tsev neeg)
- Khob noom noj

Ib tse neeg koom tau ua tsev neeg hmo ua ke ua tej yam txawv qhov no los tau. Ib yam dab tsi uas sau tsev neeg los ua ke, pab kom lawv ib tug hlab ib tug, pab kom lawv txav los nyob ze dua rau Leej Txiv Saum Ntuj Ceeb Tsheej, thiab yaum kom lawv coj lawv lub neej ncaj ncees yeej yog ib tse neeg hmo ua ke. Tej yam txawv no yog kev nyeem vaj lug kub, sib tham txog txoj moo zoo, hais lus pov thawj, ua ib txoj hauj lwm pab lwm tus, hu nkauj ua ke, mus noj su nraum zoov, ua si li ib tse neeg, thiab mus yos pem roob. Txhua tsev neeg hmo ua ke yuav tsum muaj kev thov Vajtswv.

Tej zaj lus qhia rau tsev neeg hmo ua ke yuav qhia txog cov vaj lug kub; cov yaj saub hauv hnuv nyoog kawg tej lus, qhov tseem ceeb yog tej lus uas lawv hais hauv tej tuam rooj sab laj; thiab tej yam tau muaj los hauv nej lub neej thiab tej lus pov thawj. Tej zaj lus qhia feem ntau yuav tsum qhia

txog tus Cawm Seej txoj kev yug los, lub neej, tej lus qhia, thiab txoj kev Theej Txhoj. *Txoj Moo Zoo Tej Ntsiab Cai, Gospel Fundamentals, True to the Faith, Phau Ntawv Ntxiv Dag Zog rau Cov Tub thiab Ntxhais Hluas*, thiab lub Koom Txoos tej ntawv xov xwm muaj tej zaj thiab tej lus qhia txog ntau yam uas yus siv ua tej zaj lus qhia rau tsev neeg hmo ua ke.

Tej zaj lus qhia rau tsev neeg hmo ua ke yog cov nram qab no:

- Txoj kev cawm seej
- Yexus lub neej thiab tej lus qhia
- Kev hloov siab lees txim
- Kev thov Vajtswv
- Kev yoo mov
- Lo Lus Txawj Ntse
- Tus Tswv txoj kev coj ncaj thiab huv
- Lub ntsiab ntawm lub cim nco txog
- Kev them ib feem kaum
- Kev zoo siab ua tsaug
- Kev siab dawb
- Kev hawm Vajtswv thiab kev hwm tej yam Nws tau tsim
- Kev npaj rau kev cai raus dej, kev tsa rau lub pov thawj hwj, los sis kev sib yuav
- Kev npaj mus hauv lub tuam tsev
- Kev nyeem cov vaj lug kub
- Kev ceev Hnuv Caiv kom dawb huv
- Kev zam txim rau luag tej

- Kev txais thiab kev hais lus pov thawj
- Kev qhia txoj moo zoo rau luag tej
- Kev ua tsev neeg zaj keeb puam
- Kev to taub thiab txais kev tuag
- Kev kov yeej tsev neeg tej teeb meem
- Kev siv tsev neeg cov nyiaj zoo zoo
- Kev sib pab ua hauj lwm hauv tsev
- Kev nyiam thiab zoo siab mloog tej zaj nkauj

Tej Hnub Ua Koob Tsheej thiab tej lub Sij Hawm Tseem Ceeb

Tej hnub ua koob tsheej thiab tej lub sij hawm tseem ceeb, zoo li Hnub Yexus Yug Los; Hnub Yexus Sawv Rov Los; hnub uas lub pov thawj hwj muaj rov qab los; tej rooj sab laj; lub sij hawm ib tug hauv tsev neeg mus ua tub txib; los sis hnub uas ib tug hauv tsev neeg yug los, ua kev cai raus dej, los sis txais lub pov thawj hwj, tag nrho yog tej lub sij hawm zoo heev los qhia txog txoj moo zoo tej kev tseeb.

Nyiaj Ib Feem Kaum thiab Nyiaj Pub

Tus Tswv tau txib Nws cov neeg kom ua raws li txoj kev cai them ib feem kaum kom lawv thiaj yuav tsim nyog txais yuav tej koob hmoov uas tau cog lus tseg lawm (saib Malakis 3:8–11).



Ib lub sij hawm zoo uas cov niam txiv qhia tau txog kev cai them ib feem kaum thiab txog kev them nyiaj pub yog thaum lawv them lawv li. Cov me nyuam yuav ua tej yam lawv pom lawv niam thiab txiv ua. Cov me nyuam uas txais nyiaj yuav tsum them ib feem kaum ntawm cov nyiaj ntawd. Txhua tus me nyuam yuav tsum muaj peb qhov chaw khaws nyiaj cia: ib qho teem tseg rau nyiaj ib feem kaum, ib qho teem tseg rau nyiaj mus ua tub txib, ib qho teem tseg rau nyiaj siv yuav yam ub yam no. Txhua zaus ib tug me nyuam twg txais tau nyiaj lawm, nws yuav tsum xub tso nyiaj ib feem kaum hauv qhov chaw cia nyiaj thiab ib ntawd ua ntej, ces tso me ntsis nyiaj hauv qhov chaw cia nyiaj npaj mus ua tub txib, thiab yog nws seem tshuav nyiaj li cas nws yuav tsum muab tso rau qhov chaw cia nyiaj siv yuav yam ub yam no.

Thaum cov me nyuam them ib feem kaum, cov niam txiv yuav tsum qhia lawv kom lawv txawj ua ib daig ntawv pub ib feem kaum, muab daim ntawv thiab cov nyiaj ntsaws rau hauv lub hnab ntawv, thiab muab los sis xa lub

hnav ntawv rau ib tug hauv pawg npis sov los sis ib tug hauv ceg ntseeg pawg thawj tswj hwm. Tej tsev neeg uas nyob hauv ib qho chaw deb ntawm lub Koom Txoos yuav tsum muab lawv cov nyiaj ib feem kaum rau lawv tus thawj koj ntawm lub pov thawj hwj.

Kev Sib Tham Thaum Noj Mov Ua Ke

Tej lub sij hawm thaum noj ib pluag mov ua ke yog tej lub sij hawm zoo los sib tham txog txoj moo zoo. Cov me nyuam me me nyiam noog thiab teb tej lus noog txog txoj moo zoo. Thaum lawv tsis paub tias yuav teb li cas, tus txiv tsev los sis tus niam tsev teb tau thiab qhia txoj moo zoo. Nws tsis tas yuav siv txhua lub sij hawm noj mov ua ke kom tham txog txoj moo zoo tiam sis kev sib tham li no ob peb zaug txhua lub lim piam yuav pab tsev neeg kawm txoj moo zoo.

Tham Dab Neeg Thaum Npaj Pw Tsaug Zog

Vim cov me nyuam feem coob nyiam mloog dab neeg ua ntej lawv yuav pw tsaug zog, yus siv tau lub sij hawm no los qhia txoj moo zoo thaum hais los sis nyeem tej dab neeg hauv cov vaj lug kub, lub Koom Txoos tej ntawv xov xwm, los sis tej yam tau muaj los hauv yus lub neej. Tej dab neeg txog kev siab dawb, kev sib faib, thiab kev ua siab zoo yuav qhia txoj moo zoo tej ntiab cai tseem ceeb.

Ua Hauj Lwm Ua Ke



Muaj ntau lub sij hawm qhia txoj moo zoo thaum uas ib tse neeg ua hauj lwm ua ke hauv tsev. Piv xam li, thaum tu tsev los sis ua hauj lwm hauv vaj, cov niam txiv yuav tsum nrhiav sij hawm los sib tham txog txoj moo zoo. Ntau zaus ib tug me nyuam yuav noog tej lo lus noog. Cov niam txiv yuav tsum siv sij hawm los teb tej lus noog no kom yooj yim. Thaum yuav hais tej yam zoo li “Koj txawj ua hauj lwm zoo. Kuv paub tias Leej Txiv Saum Ntuj Ceeb Tsheej zoo siab rau koj” los sis “Saib cov huab zoo zoo nkauj no uas Leej Txiv Saum Ntuj Ceeb Tsheej tau tsim lawm” tej lus no ua rau me nyuam muaj siab ua peb Leej Txiv Saum Ntuj Ceeb Tsheej tsaug thiab ua rau me nyuam paub tias Nws yeej muaj txoj sia nyob tiag.

Tsev Neeg tej Kev Sib Koom Sab Laj

Niam thiab txiv muaj cai sau cov neeg hauv lawv tsev neeg los ua ke ua tsev neeg kev sib koom sab laj. Tej tsev neeg siv tau tej kev sib koom sab laj no kom cuab tsev neeg tej hom phiaj,



kov yeej tsev neeg tej teeb meem, sib tham txog nyiaj txiag, npaj yam ub yam no, ib leeg txhawb nqa thiab pab ib leeg, hais lus tim khawv, thiab thov Vajtswv pab sawv daws. Nej koom ua tej kev sab laj no thaum twg uas nej toob kas los tau. Tej zaum cov niam txiv yuav xav koom ua tsev neeg tej kev sib koom sab laj txhua Hnub Xya los sis ua thaum ua tsev neeg hmo ua ke. Yog yuav ua kom kev sib koom sab laj thiaj zoo zoo tuaj no ces txuha tus yuav tsum ua tib zoo mloog thiab ua tib zoo xav txog tej yam uas yus yuav hais.

Txoj Kev Xam Phaj Ib Tug



Muaj niam txiv coob tug uas pom tau tias kev xam phaj lawv cov me nyuam txhua tus yuav pab cov lawv txav los nyob ze rau lawv cov me nyuam, pab lawv, thiab qhia txoj moo zoo rau lawv. Tej kev xam phaj no muaj txheej txheem thiab tsis muaj los tau thiab koom ua ntau zaus los tau.

Tus niam los sis txiv yuav tau qhia txoj kev hlub thiab txoj kev zoo siab rau tus me nyuam, thiab tus me nyuam yuav tsum muaj cib fim qhia tej uas nws lub siab xav tau txog txhua yam, teeb meem, los sis tej uas tau muaj los rau nws lawm. Tus niam los sis txiv yuav tsum ua tib zoo mloog thiab ua siab tiag thaum tham txog lawv tej teeb meem los sis lwm yam tseem ceeb. Tej zaum tus niam los sis txiv thiab tus me nyuam yuav xav thov Vajtswv ua ke. Tej teeb meem uas tau sib tham txog hauv kev xam phaj uas hais txog lwm tus hauv tsev neeg yuav muab kho tau thaum ua tsev neeg hmo ua ke.

Tsev Neeg tej Yam Ntxim Saib Ntxim Ua

Niam thiab txiv yuav tsum nrhiav sij hawm kom tsev neeg ua ntau yam ua ke. Tej yam uas ib tse neeg zoo siab ua tau ua ke yog noj mov nraum zoov, pw pem hav zoov, ua tsev neeg tej hauj lwm, tu vaj tu tsev, mus ua luam dej, taug kev mus ncig nraum zoov, saib tej yeeb yaj kiab zoo zoo, thiab ntau yam kev ua si ntxiv.

Ib tse neeg uas zoo siab ua tej yam ua ke yuav sib raug zoo thiab muaj kev hlab. Cov me nyuam yuav xav mloog lawv niam txiv ntau dua thiab ua

raws li lawv tej lus ntuas thaum lawv hlab niam txiv. Cov niam txiv yuav txawj qhia txoj moo zoo zoo dua rau cov me nyuam.



Ua Raws Li tej Kev Lav Ris hauv Tsev Neeg



Tus Tswv lub Koom Txoos txoj hauj lwm yog kom pab tib neeg txhua tus los cuag Khetos. Tej tsev neeg yuav ua tau txoj hauj lwm no thaum lawv:

1. Npaj rau lawv tej kev toob kas ntawm sab ntsuj plig thiab sab cev nqaj daim tawv thiab pab luag tej kom lawv tau lawv tej kev toob kas thiab.
2. Qhia txoj moo zoo rau luag tej.
3. Saib xyuas kom cov hauv tsev neeg txais lawv tej kab ke hauv lub tuam tsev thiab pab lawv tej poj koob yawm txwv uas tau tuag lawm txais tej koob hmoov no thiab.

Sab Ntsuj Plig thiab Sab Cev Nqaj Daim Tawv tej Kev Toob Kas

Sab Ntsuj Plig tej Kev Toob Kas

Zaj ua ntej hauv phau ntawv pab no, “Txoj Kev Qhia Txoj Moo Zoo Hauv Lub Tsev,” muaj lus qhia txog tias ib tse neeg ua tau dab tsi kom tau tej yam lawv toob kas ntawm sab ntsuj plig.

Sab Cev Nqaj Daim Tawv tej Kev Toob Kas

Tej tsev neeg yuav tsum txawj ua txhua yam rau lawv tus kheej kom lawv thiaj tau tej yam uas lawv toob

kas ntawm sab cev nqaij daim tawv thiab kom lawv pab tau luag tej. Kom thiaj peem tau los ua txhua yam rau lawv tus kheej, cov hauv tsev neeg yuav tsum kam ua hauj lwm. Ib txoj hauj lwm yog tej yam yus siv yus lub dag lub zog ua, yus paj hlwb ua, los sis yus sab ntsuj plig ua. Nws yog ib lub hauv paus ntawm kev ncav cuag yus tej hom phiaj, kev zoo siab, kev xav zoo zoo txog yus tus kheej, thiab kev vam meej. Cov niam txiv yuav tsum sim ua txhua yam rau lawv tus kheej thiab qhia lawv cov me nyuam kom ua tib yam nkaus. Txoj kev txawj ua txhua yam rau lawv tus kheej yuav ua rau lawv txawj pab cov uas muaj kev toob kas.

Cov txiv tsev muaj kev lav ris yuav tsum khwv kom muaj txhua yam uas xav tau hauv lub neej no thiab pov hwm lawv tsev neeg. Cov niam muaj kev lav ris yuav tsum tu lawv cov me nyuam. Niam thiab txiv saib xyuas kom lawv tsev neeg muaj ib lub tsev huv huv, muaj mov noj zoo, muaj khaub ncaws, muaj kev kho mob kho hniav, muaj cib fim kawm ntawv, muaj kev qhia kom txawj siv nyiaj zoo zoo, thiab, yog tias ua tau, muaj kev cob kom lawv txawj ua teb thiaj tau zaub mov noj. Cov niam txiv yuav tsum qhia lawv tej me nyuam kom lawv txawj npaj lawv cov zaub cov mov noj thiab kom lawv txawj muab nws khaws cia kom noj tau ntev mus yam tom ntej.

Cov niam thiab txiv yuav tsum kam ua hauj lwm ntau kom pab lawv cov me nyuam tau tej yam lawv toob kas

ntawm sab cev nqaij daim tawv.

“Thiab nej yuav tsis cia kom nej tej me nyuam raug tshaib plab, los sis liab qab” (Mauxiyas 4:14). Cov niam thiab txiv yuav tsum npaj zoo zoo kom thiaj yug lawv tsev neeg thaum raug kev mob, kev puas tsuaj, kev poob hauj lwm, los sis lwm yam kev txom nyem los tshwm rau lawv. Yog tias tus txiv tsev muaj teeb meem yug tsis tau nws tsev neeg ntawm sab cev nqaij daim tawv thiab yog tias cov hauv tsev neeg tsis txawj pab, nws thov tau kev pab dhau los ntawm cov thawj coj ntawm lub pov thawj hwj.

Cov me nyuam pab tau lawv tsev neeg kom tau tej lawv toob kas ntawm sab cev nqaij daim tawv los ntawm kev pab lawv niam txiv ua hauj lwm, kawm ntawv zoo zoo, ua zoo tu lawv tej khaub ncaws thiab lwm yam lawv muaj, ua rau lawv tus kheej thiab lawv lub tsev kom huv huv, thiab los ntawm kev saib xyuas lawv tus kheej zoo kom thiaj muaj kev noj qab nyob zoo.

Cov hauv tsev neeg yuav tsum xyaum kom txawj nyeem ntawv zoo dua, sau ntawv zoo dua, thiab txawj ua lej zoo dua thiab yuav tsum ua ntau npaum li lawv ua tau kom txais kev txawj ntse thiab ua rau lawv tej kev txawj kom zoo ntxiv mus. Lawv yuav tsum ceev Lo Lus Txawj Ntse thiab noj tej zaub mov zoo. Nyob hauv tej qhov chaw uas ua tau, ib tse neeg yuav tsum khaws zaub mov noj kom txaus li ib xyoo, los sis ntau npaum li ua tau, khaws tej yam uas yuav yug tau lawv. Cov hauv tsev

neeg yuav tsum ua tib xyuas kom tsis txhob tiv nqi rau tej yam uas yus tsis toob kas, khaws nyiaj rau yav tom ntej, ua tag nrho lawv tej hauj lwm, thiab siv tej yam lawv muaj zoo zoo, tsis txhob lam muab siv ua dog dig.

Cov niam txiv yuav tsum qhia lawv cov me nyuam kom sib faib nrog rau luag tej. Txhua tus faib tau ib yam, txawm yog tias lawv muaj tsawg npaum li cas los xij. Ib txoj kev pab cov uas toob kas yog los ntawm kev yoo mov ib hlis ib zaug thiab them nyiaj yoo mov, uas pab kom pub mov rau cov tshaib plab, ua tsev rau cov tsis muaj tsev nyob, pub khaub ncaaws rau cov liab qab, thiab pab cov uas raug kev txom nyem. Peb qhia pab txoj kev hlub tus Tswv thaum pab pab luag tej. Nws hais tias “Thaum nej pab kuv cov kwv tij no ib tug, txawm yog tus ntawd tsis muaj hwj chim dab tsi li los yog, nej tseem pab nws thiab, qhov uas nej pab li ntawd twb yog nej pab kuv ntag” (Mathais 25:40).

Txoj Kev Faib Txoj Moo Zoo



Dhau ntawm Nws cov yaj saub hauv hnub nyoog kawg no tus Tswv tau qhia tias txhua tus mej zeej hauv lub Koom Txoos muaj ntiag tug kom faib txoj moo zoo rau luag tej. “Nws yog txhua tus tib neeg ntiag tug hauj lwm uas tau lus ceeb toom lawm kom mus hais lus ceeb toom rau nws tus neeg zej zog. (Saib Q&K 88:81.)” Amas, ib tug yaj saub hauv Phau Ntawv Maumoos, tau piau tias thaum pab ua kev cai raus dej pab yuav tsum kam “sawv ua Vajtswv tej tim khawv rau txhua lub caij nyoog thiab rau tag nrho txhua txhia yam, thiab nyob tag nrho txhua txhua qhov chaw uas nej yuav nyob” (Mauxiyas 18:9).

Cov hauv tsev neeg yuav tsum ua ntau npaum li lawv ua tau kom pab lawv cov kwv tij, cov phooj ywg, thiab lawv cov neeg zej zog kom lawv kawm txog Yexus Khetos txoj moo zoo thiab kawm txog tej koob hmoov uas nws koj tau los rau hauv lawv lub neej. Txoj kev faib txoj moo zoo yuav ua rau cov niam txiv thiab cov me nyuam kom lawv tej lus tim khawv muaj zog ntxiv thiab kom lawv koj txoj moo zoo tej koob hmoov rau luag tej. Ib tse neeg:

- Ua tau yam ntxwv zoo zoo thaum kev ceev tag nrho tej lus txib (saib Mathais 5:16).
- Muaj kev ris txiaj rau lawv txoj kev ua mej zeej hauv lub Koom Txoos (saib Loos 1:16) thiab qhia luag tej tias lawv yog mej zeej lawm.

- Noog cov lawv paub saib lawv puas xav paub ntxiv txog lub Koom Txoos.
- Thov tus Tswv kom pab lawv xaiv ib tse neeg los sis ib tug neeg uas tau npaj lawm kom mloog txoj moo zoo.
- Qhia tsev neeg los sis tus neeg ntawd txog lub Koom Txoos, los ntawm kev caw lawv koom tsev neeg hmo ua ke los sis koom lub Koom Txoos lub rooj sab laj los sis kev ua si, los ntawm kev muab lub Koom Txoos tej ntawv rau lawv nyeem, los sis nrog lawv sib tham txog txoj moo zoo tej koob hmoov.
- Caw tsev neeg los sis tus neeg ntawd los hauv lawv lub tsev kom cov tub txib qhia lawv.

Cov niam txiv muaj kev lav ris yuav tsum npaj lawv tus kheej thiab lawv cov me tub me nyuam kom mus tshaj tawm txoj moo zoo puv sij hawm. Kom thiaj npaj lawv cov me nyuam, qhov tseem ceeb yog cov tub, cov niam txiv yuav tsum qhia txoj moo zoo hauv lawv lub tsev, ua ib tse neeg thiab nyeem vaj lug kub thiab thov Vajtswv lawv tus kheej thiab hauv tsev neeg, thiab sib tham ntau txog ntiag tug hauj lwm thiab tej koob hmoov uas los thaum mus faib txoj moo zoo. Lawv qhia tau lawv cov me nyuam kom lawv khaws tau nyiaj mus ua tub txib, rau siab ua hauj lwm, ua hauj lwm yug tau lawv tus kheej, thiab hlub thiab pab luag tej.

Lub Tuam Tsev tej Kab Ke rau cov Ciaj thiab cov Tuag



Hauv tej tuam tsev, cov mej zeej hauv lub Koom Txoos uas tsim nyog txais tej kab ke dawb ceev thiab khi lus nrog Vajtswv. Thiab lawv kuj ua tej kab ke pab lawv cov poj koob yawg koob uas tau tuag lawm. Hauv tej qhov chaw uas ua tau, tus txiv tsev thiab tus niam tsev yuav tsum txais daim ntawv nkag mus hauv tuam tsev los ntawm lawv cov thawj cov ntawm lub pov thawj hwj thiab mus rau ib lub tuam tsev kom txais lawv lub tuam tsev tej kab ke. Yog tias lawv tseem tsis tau tsim nyog mus rau hauv lub tuam tsev, lawv yuav tsum ua lawv lub neej kom tsim nyog txais daim ntawv nkag mus hauv lub tuam tsev.

Ib tse neeg muaj ntiag tug hauj lwm dawb ceev kom thiaj ua tau lub tuam tsev tej kab ke rau lawv cov poj koob yawm txwv uas tau tuag lawm uas

tsis tau txais tej kab ke no. Cov mej zeej ntawm lub Koom Txoos uas tau txais lawv tej kab ke lawm yuav tsum rov mus rau lub tuam tsev ntau npaum li ua tau, npaum li muaj nyiaj txaus mus, thiab npaum li lub tuam tsev pub mus kom ua tej kab ke rau lawv cov poj koob yawm txwv uas tau tuag lawm.

Cov txiv tsev thiab cov niam tsev yuav tsum muab tej ntawv tseem ceeb hauv nkawd lub neej thiab hauv nkawd cov me nyuam lub neej sau ua ke, zoo li cov ntawv pov thawj thaum txais tej koob hmoov, kev cai raus dej, kev tsa ua hauj lwm, kev sib

yuav, thiab kev tuag; tej tsab ntawv tseem ceeb; tej duab; tej ntawv xov xwm tseem ceeb; thiab lwm yam ntawv zoo li no. Nkawd yuav tsum sau nkawd tus kheej zaj liv xwm thiab yaum txhua tus hauv tsev neeg kom sau lawv zaj liv xwm thiab. Nkawd yuav tsum pab cov me nyuam uas tseem yau kom pib lawv zaj liv xwm.

Ib tse neeg yuav tsum khaws tej ntaub ntawv txog lawv poj koob yawm txwv ua ke thiab muab tej no sau hauv tsev neeg zaj liv xwm. Lawv yuav tsum pib sau tej xov xwm txog plaub tiam neeg ua ntej lawv lub neej.

Txoj Kev Kawm Ua Thawj Coj



Los ntawm ceg txheem ntseeg, qhov chaw tshaj tawm txoj moo zoo, los sis koog chaw cov thawj coj, lub pov thawj hwj thiab cov koom haum pab cov thawj coj yuav tsum qhia cov niam thiab txiv kom lawv to taub thiab ua peb txoj kev lav ris rau tsev neeg (saib phab ntawv 12–15). Cov thawj coj yuav tsum qhia txhua tus txiv tsev thiab niam tsev kom nkawd txawj coj nws tsev neeg. Yog tias ib tse neeg nyob deb deb ntawm lub Koom Txoos, cov thawj coj ntawm ceg txheem ntseeg, qhov chaw tshaj tawm txoj moo zoo, los sis koog chaw, yuav tsum saib xyuas kom cov niam txiv kawm thiab ua lawv ntiag tug hauj lwm.

Muaj txoj Kev Teev Ntuj Nyob Tom Tsev (Rau tej Yim Neeg uas Nyob Nrug Deb lub Koom)



Txoos)

Muaj tej yim neeg uas nyob deb deb ntawm lwm tus neeg thiab lawv mus tsis tau koom pawg ntseeg los sis ceg ntseeg tej kev sib ntsib. *Los ntawm tus thawj tswj hwm ntawm ceg txheem ntseeg, qhov chaw tshaj tarwm txoj moo zoo, los sis koog chaw, txoj kev pom zoo, tej tsev neeg zoo li no yuav tsum koom nrog tej rooj sab laj uas ua Hnub Caiv hauv lawv lub tsev. Nyob hauv tej qhov chaw uas tsis muaj lub Koom Txoos tej pawg, tej yim neeg xav tau Cheeb Tsam tus Thawj Tswj Hwm kev tso lus.*

Tus txiv tsev los sis lwm tus uas tuav lub pov thawj hwj npaj tau thiab foom koob hmoov tau rau lub cim nco txog, yog tias nws tsim nyog, yog tias nws

yog ib tug pov thawj hauv lub Pov Thawj Hwj Aloos los sis tuav lub Pov Thawj Hwj Mekixedes, *thiab yog tias nws tau txais kev pom zoo los ntawm nws cov thawj coj hauv lub pov thawj hwj.* Ib tug uas tuav lub pov thawj hwj faib tau lub cim nco txog. Tej lus qhia txog txoj kev faib lub cim nco txog nyob ntawm phab 00-00 [21-23] hauv phau ntawv no.

Txoj kev pe hawm thaum Hnub Caiv yuav tsum yooj yim, tswm seeb, thiab ua ntsiag to. Yus ua tej yam nram no los tau:

1. Hu nkauj qhib
2. Thov Vajtsv qhib
3. Foom koob hmoov thiab faib lub cim nco txog

4. Ib los sis ob peb yam ntawm cov nram no:

- Hais ib los sis ob zaj lus los sis hais lus pov thawj
- Nyeem vaj lug kub thiab ua ib tse neeg sib tham ua ke
- Ib tug hauv tsev neeg qhia ib zaj lus qhia

5. Hu nkauj xaus

6. Thov Vajtswv xaus

Thaum yuav npaj Hnub Caiv txoj kev pe hawm, niam thiab txiv yuav tsum nrhiav thiab ua raws li tus Tswv tus Ntsuj Plig txoj kev coj. Cov neeg hauv Phau Ntawv Maumoos tau ua yam ntxwv txog qhov no: “Thiab lawv tej kev sab laj raug coj . . . raws li tej kev ua hauj lwm ntawm tus Ntsuj Plig, thiab los ntawm lub hwj chim ntawm tus Vaj Ntsuj Plig Dawb Huv; vim thaum lub hwj chim ntawm tus Vaj Ntsuj Plig Dwb Huv tau coj lawv saib yuav qhuab qhia yam twg, los sis yuav thov Vajtswv, los sis yuav thov yam dab tsi, los sis yuav hu nkauj, ces nws twb raug ua tiav” (Maulaunais 6:9).

Ib tse neeg yuav tsum siv cov vaj lug kub ua lawv lub hauv paus coj, lawv siv tau tej zaj lus hais hauv lub tuam rooj sab laj, *Gospel Fundamentals, Txoj Moo Zoo Tej Ntsiab Cai, True to the Faith, Txoj Kev Ntxiv Dag Zog rau cov Tub thiab Ntxhais Hluas*, cov tub txib tej me nyuam phau ntawv, lub Koom

Txoos lwm cov ntawv xov xwm thiab kab xev.

Yog tias tsis muaj leej twg hauv tsev neeg uas tuav lub pov thawj hwj yog, tus txiv tsev los sis tus niam tsev sau tau lawv tsev neeg ua ke hu nkauj, kawm cov vaj lug kub, thov Vajtswv, kom thiaj li txav los nyob ze dua thiab txav los nyob ze Leej Txiv Saum Ntuj Ceeb Tsheej. Tus sawv ua tus thawj coj ntawm lub pov thawj hwj hauv tsev neeg yuav tsum saib xyuas kom lawv tsev neeg muaj tej lub cib fim txais lub cim nco txog.

Cov niam thiab txiv yuav tsum coj lawv tsev neeg mus ua tej yam zoo hauv lub lim piam, zoo li mus yos pem roob, noj mov nraum zoov, mus saib tej muv vim zoo zoo, mus xyuas kwv tij, mus ua si, mus mloog neeg ntaus thiab hu nkauj, thiab mus ua luam dej.

Tsev neeg yuav tsum them ib feem kaum, them nyiaj yoo mov, thiab lwm cov nyiaj pab rau lawv tus thawj coj ntawm lub pov thawj hwj.

Tsev neeg no tsis ua ntaub ntawv dab tsi xa rau lub Koom Txoos, tiam sis lawv tus thawj coj ntawm lub pov thawj hwj yuav tsum xam phaj tus txiv tsev raws caij raws nyoog, thiab nug seb lawv tsev neeg nyob li cas. Thaum twg xav tau ces, cov thawj coj muaj cai xam phaj li no hauv xov tooj los tau.

Lub Pov Thawj Hwj tej Kab Ke thiab tej Koob Hmoov



Lub pov thawj hwj tej kab ke yog tej yam dawb ceev uas raug muab los ntawm tus Tswv thiab uas muab ua los ntawm txoj cai ntawm lub pov thawj hwj. Lub pov thawj hwj tej koob hmoov raug muab los ntawm txoj cai ntawm lub pov thawj hwj rau kev kho mob, kev nplij siab, thiab kev txhawb pab. Cov kwv tij uas ua tej kab ke thiab tej koob hmoov yuav tsum npaj lawv tus kheej los ntawm kev ceev txoj moo zoo tej ntsiab cai thiab kev ua tib zoo raws tus Ntsuj Plig Dawb Huv tej kev coj. Lawv yuav tsum ua tib zoo ua txhua yam kab ke thiab koob hmoov thiab ua raws li tej kev coj nram qab no: txoj kab ke yuav tsum:

1. Ua tej no los ntawm Yexus Khetos lub npe.

2. Ua tej no los ntawm txoj cai ntawm lub pov thawj hwj.

3. Ua tej no siv tej yam raws kev cai, zoo li hais tej lus tseem ceeb los sis siv roj uas tau foom koob hmoov rau lawm.

4. Yog tias tsum nyog thov, ua tej no los ntawm tus thawj coj ntawm lub pov thawj hwj uas tuav cov yawm sij yog.

Tej kab ke uas yuav tsum tau ib tug thawj coj ntawm lub pov thawj hwj txoj kev pom zoo yog kev tis npe thiab kev foom koob hmoov rau me nyuam, ua kev cai raus dej thiab ua kev pom zoo ua mej zeej, kev muab lub pov thawj hwj thiab kev tsa ua hauj lwm hauv lub pov thawj

hwj, kev foom koob hmoov thiab kev faib lub cim nco txog, thiab kev fij qua ntxa.

Thaum muaj coob tug txiv neej pab koom uas ib txoj kab ke los sis foom koob hmoov, txhua tus tso nws sab tes laug rau ntawm tus txiv neej uas sawv ntawm nws sab laug. Peb yaum kom tsis txhob caw cov txiv neej uas tuav lub pov thawj hwj coob heev tuaj koom tej kab ke no.

Tej kab ke thiab tej koob hmoov uas hais txog hauv zaj no yuav pab cov txiv tsev ua yawg suab hauv lawv tsev neeg.

Txoj Kev Tis Npe thiab Kev Foom Koob Hmoov rau Me Nyuam



“Txhua tus mej zeej ntawm Khetos lub Koom Txoos uas muaj me nyuam yuav tsum coj lawv los ntawm cov txwj laug hauv lub koom txoos, uas yuav tsum tso lawv tes rau saum cov me nyuam los ntawm Yexus Khetos lub npe, thiab foom koob hmoov rau lawv tuav nws lub npe. (Saib Q&K 20:70)” Kom ua raws li txoj kev

tshwm sim no, cov txiv neej ncaj ncees uas tuav lub Pov Thawj Hwj Mekixedes xwb thiaj koom tau qhov los ua kev tis npe thiab kev foom koob hmoov rau me nyuam. *Txoj kab ke tis npe thiab kev foom koob hmoov rau me nyuam yuav tsum muaj kev pom zoo los ntawm tus thawj coj saib xyuas.*

Thaum foom koob hmoov rau ib tug me nyuam mos liab, cov txiv neej uas tuav lub Pov Thawj Hwj Mekixedes los ua ib lub voj voog thiab tuav tus me nyuam mos liab hauv lawv txhais tes. Thaum foom koob hmoov rau cov me nyuam loj zog, cov txiv neej maj mam tso lawv txhais tes rau saum tus me nyuam lub taub hau. Tus uas yuav foom koob hmoov yuav:

1. Hais peb Leej Txiv Saum Ntuj Ceeb Tsheej.
2. Hais tias txoj koob hmoov no yog ua los ntawm txoj cai ntawm lub Pov Thawj Hwj Mekixedes.
3. Muab lub npe rau tus me nyuam.
4. Foom koob hmoov los ntawm lub pov thawj hwj raws li tus Ntsuj Plig coj yus hais.
5. Xaus los ntawm Yexus Khetos lub npe.

Txoj Kev Cai Raus Dej

Los ntawm tus thawj coj saib xyuas txoj kev coj, ib tug pov thawj los sis ib tug txiv neej uas tuav lub Pov Thawj Hwj Mekixedes uas tsim nyog muaj cai muab neeg ua kev cai raus dej. Kom ua tau li no, nws:



1. Sawv ntsug hauv cov dej nrog tus neeg uas yuav raug muab ua kev cai raus dej.
2. Kom yuav yooj yim thiab tsis muaj teeb meem, nws muab nws txhais tes laug tuav tus neeg ntawd sab dab teg xis; tus neeg uas yuav raug muab ua kev cai raus dej tuav tus neeg uas muab nws ua kev cai raus dej sab dab teg laug nrog rau nws txhais tes laug.
3. Tsa nws txhais tes xis ua ib ceg kaum.
4. Hais tus neeg ntawd lub npe tag nrho thiab hais tias, “Tau muab cai rau kuv los ntawm Yexus Khetos, kuv muab koj ua kev cai raus dej nyob ntawm Leej Txiv, thiab ntawm Leej Tub, thiab ntawm tus Vaj Ntsuj Plig Dawb Huv lub npe. Anees” (Q&K 20:73).
5. Kom yuav yooj yim dua, kom tus neeg muab nws txhais tes xis los nyem nws qhov ntswg; tus uas muab tus neeg ua kev cai raus dej tso nws sab tes xis rau ntawm tus neeg ntawd lub nraub qaum thiab muab nws raus dej kom ploj ib ce

tag nrho, hais txog nws cov khaub ncaws huv tib si.

6. Pab tsa tus neeg ntawd sawv hauv cov dej tawm los.

Ob tug pov thawj los sis ob tug txiv neej uas tuav lub Pov Thawj Hwj Mekixedes yuav tsum los ua tim khawv saib tias tau ua txoj kev cai raus dej ntawd raws cai lawm. Yog tias cov lus thov Vajtswv uas muaj nyob hauv Phau Lus Qhuab Qhia thiab Kev Khi Lus 20:73 hais tsis yog lawm los sis yog tus neeg ntawd lub cev los sis cov khaub ncaws tsis muab raus hauv dej tag nrho, ces yuav tsum rov muab tus neeg ntawd rov qab ua kev cai raus dej dua. Tus neeg uas tab tom ua kev cai raus dej thiab tus uas yuav ua txoj kab ke no yuav tsum hnav khaub ncaws dawb tiam sis tsis txhob pom tau sab hauv thaum ntub lawm.

Txoj Kev Pom Zoo Ua Mej Zeej

Cov neeg hloov siab los ntseeg tshiab uas muaj cuaj xyoos rov saud thiab cov uas muaj yim xyoo thiab lawv niam thiab txiv tib si tsis yog mej zeej yuav tau kev pom zoo hauv ib txoj kev sib ntsib noj lub cim nco txog (saib Q&K 20:41). Cov me nyuam uas muaj yim xyoo txais tau kev pom zoo tom qab ua kev cai raus dej hauv txoj kev sib ntsib ua kev cai raus dej yog tias niam los sis txiv yog ib tug mej zeej hauv lub Koom Txoos thiab niam thiab txiv tib si tso lus rau lawv ua kev cai raus dej thiab kev pom zoo.

Los ntawm tus npis sov los sis ceg ntseeg tus thawj tswj hwm txoj kev koj, ib los sis ob peb tug txiv neej uas tuav lub Pov Thawj Hwj Mekixedes ua tau txoj kab ke no. Lawv tso lawv tes rau saum tus neeg ntawd lub taub hau. Ces tus uas ua txoj kab ke no:



1. Hais tus neeg ntawd lub npe tag nrho.
2. Hais tias tau ua txoj kab ke ntawd los ntawm txoj cai ntawm lub Pov Thawj Hwj Mekixedes.
3. Pom zoo muab tus neeg ntawd ua ib tug mej zeej nyob hauv Yexus Khetos lub Koom Txoos ntawm Tsoom Haiv Neeg Ntseeg hauv Hnub Nyoog Kawg.
4. Muab lub txiaj ntsim Vaj Ntsuj Plig Dawb Huv rau nws hais tias, "Cia li txais tus Vaj Ntsuj Plig Dawb Huv."

5. Foom koob hmoov los ntawm lub pov thawj hwj raws li tus Ntsuj Plig koj nws hais.
6. Xaus los ntawm Yexus Khetos lub npe.

Txoj Kev Muab lub Pov Thawj Hwj Rau thiab Kev Tsa Ua Ib txoj Hauj Lwm hauv lub Pov Thawj Hwj



Tus npis sov los sis tus thawj tswj hwm ntawm ceg ntseeg yuav saib xyuas kev muab lub Pov Thawj Hwj Aloos rau thiab kev tsa ua txoj hauj lwm di kas, xib hwob, thiab pov thawj. Ua ntej ib tug neeg yuav raug tsa los ua hauj lwm hauv lub Pov Thawj Hwj Aloos, tus npis sov los sis ceg ntseeg tus thawj tswj hwm yuav tsum xam phaj nws thiab nrhiav pom tias nws tsim nyog txais. Thiab sawv daws yuav tsum tsa tes pom zoo rau nws txais nyob rau hauv ib txoj kev sib ntsib noj lub cim nco txog. Thaum tus npis sov los sis ceg ntseeg tus thawj tswj hwm pom zoo, ib tug pov thawj muaj cai muab lub Pov Thawj Hwj Aloos rau lwm tus

neeg thiab tsa nws los ua hauj lwm hauv lub Pov Thawj Hwj Aloos.

Tus thawj tswj hwm ntawm ceg txheem ntseeg los sis qhov chaw tshaj tawm txoj moo zoo yuav saib xyuas kev muab lub Pov Thawj Hwj Mekixedes rau thiab kev tsa ua txoj hauj lwm txwj laug thiab pov thawj hlob.

Kom yuav muab lub pov thawj hwj rau los sis kom yuav tsa ua ib txoj hauj lwm hauv lub pov thawj hwj, ib los sis ob peb tug txiv neej uas tuav lub pov thawj hwj yog thiab uas tau txais kev pom zoo los ntawm tus thawj coj saib xyuas tso lawv tes saum tus neeg ntawd lub taub hau. Ces tus uas ua txoj kab ke no:

1. Hais tus neeg ntawd lub npe tag nrho.
2. Hais tias tau txoj cai ntawm (lub Pov Thawj Hwj Aloos los sis Mekixedes) yuav ua txoj kab ke ntawd.
3. Muab lub Pov Thawj Hwj Aloos los sis Mekixedes rau, yog tias tsis tau muab nws yav tas los lawm.
4. Tsa tus neeg ntawd ua ib txoj hauj lwm hauv lub Pov Thawj Hwj Aloos los sis Mekixedes thiab foom pub tej kev muaj peev xwm, tej hwj chim, thiab txoj cai ntawm txoj hauj lwm ntawd.
5. Foom koob hmoov los ntawm lub pov thawj hwj raws li tus Ntsuj Plig coj nws hais.
6. Xaus los ntawm Yexus Khetos lub npe.

Lub Cim Nco Txog



Lub cim nco txog yog ib txoj kab ke dawb ceev. Txoj kev txais lub cim nco txog pab yus muaj lub cib fim nco ntsoov txog Yexus Khetos lub neej, tej lus qhia, thiab txoj kev Theej Txhoj. Nws yog ib lub sij hawm kom rov khi tej kev khi lus uas peb khi nrog tus Tswv thaum peb ua kev cai raus dej (saib Mauxiyas 18:8–10).

Cov xib hwb thiab cov pov thawj muaj cai npaj lub cim nco txog; cov pov thawj muaj cai foom koob hmoov rau lub cim nco txog; thiab cov dikas, cov xib hwb, thiab cov pov thawj puav leej muab lub cim nco txog faib rau cov ntseeg los tau. Cov kwv tij uas tuav lub Pov Thawj Hwj Mekixedes muaj cai npaj, foom koob hmoov rau, thiab faib lub cim nco txog tiam sis feem ntau lawv yuav ua li no tsuas yog thaum tsis muaj cov kwv uas tuav lub Pov Thawj Hwj Aloos coob xwb. Yog hais tias ib tug neeg twg tau ua txhaum loj, nws yuav tsum tsis txhob npaj, foom koob hmoov rau, los yog faib lub cim nco txog mus txog thaum nws tau hloov siab lees txim thiab tau nrog nws tus thawj tswj hwm hauv

nws ceg ntseeg sib tham kom haum tso, nws mam li ua.

Txhua tus uas npaj, foom koob hmoov, los sis faib lub cim nco txog ua txoj kab ke no rau luag tej sawv tus Tswv cev. Txhua tus uas tuav lub pov thawj hwj yuav tsum ua txoj hauj lwm nrog lub siab mos muag, lub siab tswm seeb lawm. Nws yuav tsum tu cev zoo, huv thiab hnav khaub ncaws zoo. Tej uas nws hnav yuav tsum phim txoj kab ke dawb ceev no.

Cov kwv tij uas npaj lub cim nco txog yuav tsum ua li no ua ntej txoj kev sib ntsib pib. Lawv yuav tsum tso khob cij uas tsis tau ntais nyob ntawm ib lub tais huv huv yuav tsum tso cov khob uas muaj me ntsis dej huv hauv rau saum lub rooj. Lawv yuav tsum npog cov khob cij thiab cov dej siv ib daig ntaub dawb dawb huv.

Thaum tab tom hu nkauj nco txog lub cim, cov uas foom koob hmoov rau lub cim nco txog yuav tsum tshem daim ntaub ntawm cov khob cij thiab muab cov khob cij ntais ua tej dwb daim me me. Tom qab hu nkauj lawm, tus neeg uas yuav foom koob hmoov rau cov khob cij cia li txhos caug thiab thov Vajtswv foom koob hmoov rau cov khob cij. Ces cov kwv tij yuav ua twb zoo muab cov khob cij faib yam muaj txheej txheem thiab kev tswm seeb li. Tus thawj coj uas saib xyuas txoj kev sib ntsib ntawd yuav tsum xub txais lub cim nco txog. Thaum tag nrho ib tsoom ntseeg tau noj khob cij lawm, cov neeg uas tau faib yuav tsum nqa lawv cov phaj rov

qab los rau ntawm lub rooj rau lub cim nco txog. Ces cov uas tau foom koob hmoov rau lub cim yuav tsum muab daim ntaub npog cov khob cij kom tas.

Cov uas sawv ntawm lub rooj rau lub cim nco txog yuav tsum tshem daim ntaub tawm ntawm cov phaj uas siv nqa cov dej. Tus neeg uas yuav foom koob hmoov rau cov dej cia li txhos caug thiab thov Vajtswv foom koob hmoov rau cov dej. Ces cov kwv tij muab cov dej cev rau sawv daws. Ces lawv nqa lawv cov phaj rov qab los rau ntawm lub rooj rau lub cim nco txog thiab muab npog dua. Ces cov kwv tij uas tau foom koob hmoov rau thiab faib lub cim nco txog cia li mus zaum nrog ib tsoom ntseeg ua ke.

Lub cim nco txog yog rau cov mej zeej hauv lub Koom Txoos, suav cov me nyuam yaus thiab. Tus neeg uas coj kev rau ntawm txoj kev sib ntsib yuav tsum tsis txhob tshaj tawm hais tias tsuas yog cov mej zeej txais tau xwb; yeej yuav tsum tsis txhob ua dab tsi kom cheem ib tug tsis ntseeg kom nws tsis txhob noj.

Yuav tsum hais lub cim nco txog tej zaj lus thov Vajtswv kom meej meej, ua tib zoo raws tej lus, thiab hais zoo zoo. Yog tias tus neeg uas foom koob hmoov rau lub cim nco txog hais yuam kev lawm thiab nws tsis kho nws cov lus, ces tus npis sov los sis ceg ntseeg tus thawj tswj hwm yuav thov kom nws rov qab hais dua thiab hais cov lus yog.

Zaj lus thov Vajtsv foom koob hmoov rau cov khob cij nyob nram qab no:

“Au Vajtsv, Leej Txiv tus uas Nyob Mus Ib Txhis, peb thov koj ntawm koj Leej Tub, Yexus Khetos lub npe, kom koj foom koob hmoov thiab tshwj cov mov mog no tseg cia kom dawb huv rau lawv sawv daws cov tau noj, kom lawv cov uas tau noj kom nco txog koj Leej Tub lub cev, thiab ua tim khawv rau koj, Au Vajtsv, Leej Txiv tus uas Nyob Mus Ib Txhis, kom lawv txaus siab txais koj Leej Tub lub npe, thiab nco ntsoov txog nws, thiab koj raws li nws tej lus txib uas nws tau muab rau lawv, kom lawv thiaj li yuav muaj nws Leej Ntsuj Plig niaj hnuv nrog lawv nyob. Amees” (Q&K 20:77; thiab Maulaunais 4).

Zaj lus thov Vajtsv foom koob hmoov rau cov dej nyob nram qab no:

“Au Vajtsv, Leej Txiv tus uas Nyob Mus Ib Txhis, peb thov koj ntawm koj Leej Tub, Yexus Khetos lub npe, kom koj foom koob hmoov thiab tshwj cov [dej] no tseg cia kom dawb huv rau lawv sawv daws cov tau haus, kom lawv cov uas tau haus kom nco txog koj Leej Tub cov ntshav, uas tau nrog theej lawv; kom lawv ua tau tim khawv rau koj, Au Vajtsv, Leej Txiv tus uas Nyob Mus Ib Txhis, kom lawv nco ntsoov txog nws, kom lawv thiaj li yuav muaj nws Leej Ntsuj Plig nrog lawv nyob. Amees” (Q&K 20:79; thiab Maulaunais 5).

Yuav tsum tshem lub cim nco txog ntawm lub rooj mus tom qab uas lub rooj sab laj tas lawm. Cov khob cij uas seem tshuav yus siv tau ua lwm yam mov los tau.

Txoj kev foom koob hmoov rau thiab txoj kev faib lub cim nco txog yog ib yam uas yus yuav tsum txais kev pom zoo los ntawm tus thawj koj saib xyuas tso yus mam pab ua.

Txoj Kev Foom Koob Hmoov rau cov Roj

Ib tug txiv neej (los sis ob peb tug) uas tuav lub Pov Thawj Hwj Mekixedes yuav foom koob hmoov rau cov roj txiv ntseej huv rau lub ntsiab dawb huv kom koj mus pleev cov raug kev mob kev nkeeg. Tus uas foom koob hmoov rau cov roj:

1. Tuav lub hwj roj uas tau muab lub hau qhib lawm.
2. Tuav peb Leej Txiv Saum Ntuj Ceeb Tsheej lub npe.
3. Hais tias nws ua tej yam no los ntawm txoj cai ntawm lub Pov Thawj Hwj Mekixedes.
4. Foom koob hmoov rau cov roj (tsis yog foom koob hmoov rau lub hwj uas ntim cov roj) thiab tshwj cov roj tseg cia rau txoj kev pleev tej neeg uas muaj mob muaj nkeeg.
5. Xaus los ntawm Yexus Khetos lub npe.



Txoj Kev Foom Koob Hmoov rau cov Neeg Mob

Tsuas yog cov txiv neej uas tuav lub Pov Thawj Hwj Mekixedes nkaus xwb uas foom koob hmoov rau cov neeg muaj mob muaj nkeeg. Feem ntau, ob los sis ob peb tug foom tej koob hmoov li no ua ke, tiam sis ib tug ua nws tus kheej los tau. Yog tias tsis muaj roj uas tshwj tseg cia lawm, ib tug txiv neej uas tuav lub Pov Thawj Hwj Mekixedes foom tau ib txoj koob hmoov los tau los ntawm txoj cai ntawm lub pov thawj hwj.

Ib tug txiv tsev uas tuav lub Pov Thawj Hwj Mekixedes yuav tsum foom koob hmoov rau cov mob hauv nws tsev neeg. Nws thov lwm tus txiv neej uas tuav lub Pov Thawj Hwj Mekixedes los pab nws los tau.

Txoj kev foom koob hmoov rau cov neeg mob muaj ob ntus ua xws li no: (1) txoj kev pleev roj thiab (2) txoj kev khi qhov kev pleev roj ntawd.

Txoj Kev Pleev Roj

Ib tug txiv neej uas tuav lub Pov Thawj Hwj Mekixedes pleev roj rau saum tus neeg mob. Kom ua tau li no, nws:

1. Siv ib tee roj pleev rau saum tus neeg mob lub taub hau.
2. Tso nws ob txhais tes rau saum tus neeg mob lub taub hau thiab hais tus neeg ntawd lub npe thiab lub xeem tag nrho.
3. Hais tias nws pleev roj rau saum tus neeg no los ntawm txoj cai ntawm lub Pov Thawj Hwj Mekixedes.
4. Hais tias nws tab tom pleev cov roj uas tau raug tshwj tseg cia lawm kom pleev thiab foom koob hmoov rau cov neeg uas muaj mob thiab kev nyuaj siab.
5. Xaus los ntawm Yexus Khetos lub npe.

Kev Khi txoj Kev Pleev Roj

Feem ntau, muaj ob peb tug txiv neej uas tuav lub Pov Thawj Hwj Mekixedes tso lawv tes rau saum tus neeg mob lub taub hau. Ib tug txiv neej yuav khi txoj kev pleev roj. Kom ua tau li no, nws:

1. Hais tus neeg ntawd lub npe thiab lub xeem tag nrho.
2. Hais tias nws tab tom khi txoj kev pleev roj los ntawm txoj cai ntawm lub Pov Thawj Hwj Mekixedes.

3. Hais lus foom koob hmoov raws li tus Ntsuj Plig koj nws hais.

4. Xaus los ntawm Yexus Khetos lub npe.

Leej Txiv txoj Koob Hmoov thiab tej Koob Hmoov ntawm txoj Kev Nplij Siab thiab Ntuas



Leej txiv txoj koob hmoov thiab lwm cov koob hmoov ntawm lub pov thawj hwj yog muab rau neeg kom ntuas lawv thiab kom nplij lawv siab raws li tus Ntsuj Plig qhia.

Ib tug txiv tsev uas tuav lub Pov Thawj Hwj Mekixedes muab tau leej txiv txoj koob hmoov rau nws cov me nyuam. Tej koob hmoov no yeej zoo thaum cov me nyuam yuav tawm tsev, zoo li mus kawm ntawv los sis mus ua tub txib, los sis thaum lawv yuav pib ib txoj hauj lwm, mus yuav poj niam los sis yuav txiv, mus ua tub rog, los sis muaj teeb meem hauv lawv lub neej. Tej koob hmoov no yog ib yam ntxiv zog rau ib tse neeg.

Ib tse neeg sau tau leej txiv txoj koob hmoov cia muab khaws hauv tsev neeg tej ntaub ntawv, tiam sis tej no tsis muab khaws cia hauv lub Koom Txoos tej ntaub ntawv. Cov niam thiab txiv yuav tsum yaum lawv cov me nyuam kom txais leej txiv txoj koob hmoov thaum tej lub sij hawm lawv muaj kev xav tau.

Cov txiv neej ncaj ncees uas tuav lub Pov Thawj Hwj Mekixedes kuj muab tau tej koob hmoov nplij siab thiab ntuas rau lawv cov poj niam, lawv cov kwv tij, thiab lwm cov neeg uas thov lawv.

Kom muab leej txiv txoj koob hmoov los sis lwm yam koob hmoov ntawm kev nplij siab thiab ntuas, tus txiv neej uas tuav lub Pov Thawj Hwj Mekixedes, nws tib leeg los sis ob peb leeg uas tuav lub Pov Thawj Hwj Mekixedes, tso lawv txhais tes rau saum tus neeg txais txoj koob hmoov no lub taub hau. Tsis tas sis roj rau tej koob hmoov zoo li no. Tus uas muab txoj koob hmoov:

1. Hais tus neeg ntawd lub npe tag nrho.
2. Hais tias nws muab txoj koob hmoov no los ntawm txoj cai ntawm lub Pov Thawj Hwj Mekixedes.
3. Muab ib txoj koob hmoov raws li tus Ntsuj Plig koj lawv hais.
4. Xaus los ntawm Yexus Khetos lub npe.

Txoj Kev Fij Qua Ntxa

Ib tug txiv neej uas fij qua ntxa
yuav tsum tuav lub Pov Thawj Hwj
Mekixedes thiab *yuav tsum txais cai
los ntawm tus thawj koj ntawm lub pov
thawj hwj uas koj lub rooj sab laj.*

Kom fij qua ntxa, nws:

1. Hais Leej Txiv Saum Ntuj Ceeb
Tsheel lub npe.
2. Hais tias nws tab tom muab qua
ntxa fij los ntawm txoj cai ntawm
lub Pov Thawj Hwj Mekixedes.
3. Fij thiab foom koob hmoov rau lub
qhov ntxa kom ua ib qho chaw so
rau tus neeg uas tau tuag lawm.

4. Hauv tej qhov chaw uas ua tau,
thov kom qhov chaw ntawd yuav
dawb huv thiab txais kev saib xyuas
txog thaum hnuv Sawv Rov Los.

5. Thov tus Tswv kom nplij tsev neeg
tej siab thiab hais tej yam ntxiv
raws li tus Ntsuj Plig koj nws hais.

6. Xaus los ntawm Yexus Khetos lub
npe.

Yog tias tsev neeg xav ua li no, ib tus
neeg (qhov zoo yuav yog ib tug txiv
nej uas tuav lub Pov Thawj Hwj
Mekixedes) thov Vajtsv foom koob
hmoov rau qua ntxa xwb thiab tsis
fij qua ntxa.

Txoj Kev Yuav lub Koom Txoos cov Ntaub Ntawv thiab txoj Kev Tshawb Nrhiav Xov Xwm txog Keeb Kwm Tsev Neeg

Cov thawj coj nyob ze thiab lwm cov mej zeej yuav tau lub Koom Txoos cov ntaub ntawv, suav cov vaj lug kub, cov ntawv qhia, lub Koom Txoos cov ntawv xov xwm, tsoos tsho, thiab ris tsho uas hnav hauv lub tuam tsev, los ntawm lub Koom Txoos lub tsev hauv paus faib khoom uas nyob ze lawv, los yog los ntawm Salt Lake lub Tsev Hauv Paus Faib Khoom, los yog

dhau ntawm txoj kev nkag mus rau lub Koom Txoos qhov chaw Internet, uas nkag tau rau ntawm www.lds.org.

Tej xov xwm txog keeb kwm tsev neeg tej hauj lwm muaj txawm peem nyob rau hauv lub Koom Txoos qhov chaw Internet rau keeb kwm tsev neeg, uas yus nkag tau rau ntawm www.familysearch.org.

YEXUS KHETOS

LUB KOOM TXOOS
NTAWM TSOOM
HAIV NEEG NTSEEG
HAUV HNUB NYOOG KAWG

